

Utusan Online 17/05/2013

## Umat Islam perlu berhati-hati dengan soft power negara luar



Sebahagian daripada delegasi asing dan wakil antarabangsa yang hadir pada Forum Keamanan dan Keselamatan 2013 di Institut Diplomasi dan Hubungan Luar (IDFR), Kuala Lumpur, semalam.

KUALA LUMPUR 16 Mei - Umat Islam perlu berhati-hati dengan pendekatan diplomasi *soft power* atau kuasa lembut daripada negara-negara kuasa luar yang boleh menghakis nilai Islam serta perpaduan umat di sesebuah negara.

Profesor Ulung, **Tan Sri Prof. Dr. Mohd. Kamal Hassan** berkata, berbanding ancaman berbentuk kekerasan, cabaran dalam bentuk *soft power* memerlukan kebijaksanaan umat Islam untuk terus mempertahankan nilai agama.

"*Soft power* boleh menjadi pentas drama, ini berlaku dalam diplomasi hari ini, di hadapan cakap dengan manis tetapi di belakang ada tangan yang menyebabkan risiko negatif.

"Dari satu sudut, konsep *soft power* ini adalah bagus tetapi kita perlu membuat tapisan terhadap nilai dan pemikiran yang cuba diterapkan, dalam hal ini, umat Islam perlu berhati-hati," katanya.

Beliau yang merupakan Profesor di Institut Pemikiran Tamadun Islam Antarabangsa (ISTAC) berkata demikian ketika menjadi ahli panel pada Forum Keamanan dan Keselamatan 2013 di Institut Diplomasi dan Hubungan Luar (IDFR) di sini hari ini.

Menurut Mohd. Kamal, antara faktor yang menyebabkan kelemahan umat Islam di sesebuah negara adalah persaingan dominasi antara parti politik untuk kuasa sehingga meminggirkan tanggungjawab dakwah serta prinsip Islam sebenar.

Jelas beliau, Islam adalah agama yang menuntut perdamaian dan umatnya perlu bersatu padu serta memegang erat ajaran Islam sebagai panduan kehidupan.

Sementara itu, Felo Institut Antarabangsa Pengajian Islam Lanjutan (IAIS), **Dr. Karim Douglas** berkata, prinsip perdamaian yang dibawa Islam perlu diperluaskan terutamanya dalam menangani persepsi negatif yang sering diberikan oleh negara Barat.

"Kita perlu kembali kepada ajaran al-Quran, Islam mengajar kita perdamaian serta menegakkan keadilan bagi menjaga keselamatan umatnya," katanya.

Sementara itu, menurut Ketua Komunikasi Yayasan Cordoba United Kingdom, **Amjad Saleem**, kajian khusus perlu dilakukan bagi memantapkan pertubuhan bukan kerajaan (NGO) Islam untuk lebih berkesan dan padu di peringkat akar umbi masyarakat.

"Jumlah dana besar yang dikutip perlu menunjukkan hasil kepada program yang dilaksanakan dan tumpuan bukan hanya kepada aspek fizikal tetapi juga pembinaan umat yang berjaya serta dapat mengecapi kehidupan yang aman," katanya.

Turut serta sebagai ahli panel forum itu adalah Pengarah Institut Diplomatik Qatar, Dr. Hassan Ibrahim Al Mohannadi.